

'Dunia Pertanian' dapat sambutan

BINTULU: Sekretariat Alumni dan Kerjaya Majlis Perwakilan Kolej (MPK) Universiti Putra Malaysia Kampus Bintulu (UPMKB) baru-baru ini menganjurkan Alumni Giving Back Series 1: Seronoknya Dunia Pertanian secara maya, yang berjaya menarik penyertaan seramai 400 pelajar.

Menurut satu kenyataan daripada UPMKB, program itu bertujuan mengukuhkan hubungan antara alumni dan pelajar selain memberi pendedahan mengenai cabaran dan peluang kerjaya dalam sektor pertanian.

Dalam kenyataan itu, Pengarah Program, Adi Mahathir Bin Mahadi berkata, program tersebut memberi ruang kepada alumni untuk berkongsi pengalaman dan memberi panduan kepada pelajar tentang realiti dunia pekerjaan dalam bidang pertanian.

Menurutnya, program itu menampilkan Andika Rahmat Kandondoig yang merupakan alumni Bachelo Sains Bioindustri dan Penyelia Ladang di Kundasang Aquafarm, sebagai penceramah.

"Beliau berkongsi teknik inovatif seperti penggunaan teknologi aquaponik dan hidroponik yang semakin popular dalam sektor ini.

"Selain itu, peserta turut didedahkan kepada kepentingan pertanian mampan dalam memastikan keseimbangan ekologi," katanya.

Sesi soal jawab interaktif turut diadakan, membolehkan pelajar mendapatkan penjelasan lanjut mengenai cabaran dalam operasi ladang komersial serta kaedah penyelesaian yang diaplikasikan oleh alumni.

Perbincangan juga menyentuh potensi kerjasama antara alumni dan pelajar dalam melaksanakan projek komuniti untuk mengembangkan sektor pertanian di Malaysia.

Inisiatif seumpama itu membuktikan komitmen UPMKB dalam melahirkan graduan yang kompeten, berdaya saing, dan bersedia menghadapi cabaran dunia pekerjaan, khususnya dalam sektor pertanian yang kini semakin berkembang.